



Senin, 7 September 2020

JEREMIA 32:1-15



PATUH NDALANKEN PERENTAH TUHAN



Kegeluhen i bas doni enda megati la tersipati kita kerna kai si jadi. Susah ras senang pegancihen jadi ras reh bas kegeluhenta. Adi paksa senang ngasup nge kita ngelakoken kai pe, tapi uga adina kita i bas masa susah? Banci nge kita tetap erbuah? Ngasup nge kita erbahan mehuli? Nabi Jeremia paksana i bas pernjara asum isuruh Tuhan ia nukur taneh juma i Anatot, kuta ketubuhenna. Kuta e nggo ndekah ikuasai Babil. Bagi tempa silang-lang nge, sanga ia i penjara nukur juma si enggo bangsa kalak ngianisa. Tapi Jeremia patuh nandangi perintah Tuhan. Engkai maka bage? *Tanda kiniteken Jeremia*. Alu nukur taneh e, icidahken Jeremia kinitekenna man Tuhan maka sisa-sisa bangsa Israel si nggeluh denga kenca pembuangan pagi mulihken nge ku negri e guna nukur juma ras mbangun rumahna. Jadi amin gia bangsa e sangana bas kecibal si getem, lit pagi masana sikap ka ngulih, janah Dibata enggo erdahin ope lenga pe ieteh manusia kai sijadi man bana ibas wari sipepagi.

Sendalanan ras kata e, situasinta pe megati tempa lanai lit arapen ras tuhu-tuhu megogo ateta, tapi adi kita sikerajangen Dibata, sidalanken peratenNa alu patuh, padan ras janjiNa jadi sikerajangenta, maka padanNa man banta mereken wari si pepagi bagi si niarapken kita.

I bas situasi Covid enda pe mari si patuh man anjuren pemerintah kerna adaptasi kebiasaan baru, sebab Undang-undang pemerintah e rehna bas Dibata nari nge. Gelah tersilahi kita arah mara, jenari ngasup ngidah kemulian Dibata ibas paksaNa. La lit perkara si mbelin si la ngasup Tuhan ndungisa, tek saja maka IA erkuasa. Saja gelah sinanami kuasaNa bas kegeluhenta ipindokenNa kita patuh ndalanken si isuruhNa. Aminna mesera si akap, tapi adi Tuhan nuruhsa, Ia nge simereken gegeh ras kepentaren man banta ndalankenca.